

# DAS NIAS

## Das Nias, Zaj 1

**Das Nias thiab cov tub Hes Nplaws nyob hauv Nas Npws Kos Dos Nos Xos tsev. 1 : 1 - 21.**

- 1 1 Thaum Zos Yas Kis ua vaj kav Yus Das teb tau peb xyoo, mas tus vaj Npas Npis Los hu ua Nas Npws Kos Dos Nos Xos tuaj vij Yes Lus Xas Les.
- 2 Huab Tais tso tus vaj Yus Das Zos Yas Kis thiab ib co twj siv hauv Tswv Ntuj lub Tuam Tsev poob rau hauv tus vaj Npas Npis Los tes. Tus vaj Npas Npis Los coj lawv mus rau teb chaws Xis Nes As, nws muab coj cov twj mus ceev cia rau hauv nws cov dab lub txhab nyiaj.
- 3 Nws txib As Pes Nas uas yog tus tswi nws cov neeg sam kom xaiv ib co me nyuam yog noob vaj los nom hauv tsoom His Xas Lais.
- 4 Yuav xaiv cov me nyuam tsis muaj chaw xyeej, muaj lub meej mom zoo, paub txuj ci, paub kev cai, tsim nyog tuaj nyob hauv tus vaj tsoom tub ncig.
- 5 As Pes Nas yuav qhia ntawv thiab qhia lus Kas Ntes rau lawv.
- 6 Ntawd muaj plaub tug yog Yus Das : yog Das Nias, As Nas Nias, Mis Xas Ees thiab As Xas Lias.
- 7 Tus tswj cov neeg sam muab lawv tis dua npe tshiab. Muab Das Nias hu ua Npas Tas Xas, As Nas Nias hu ua Xas Ntas, Mis Xas Ees hu ua Mes Sas, As Xas Lias hu ua As Npes Nes Nkos.
- 8 Das Nias xav caiv tsis nrog luag noj tus vaj tej zaub mov thiab tej dej cawv, nws thov tus tswj cov neeg sam kom nws tau

kev caiv tsis noj tej yam tsis huv.  
9 Tswv Ntuj tshoj tus tswj cov neeg sam, ces tus tswj thiab pub txiaj ntsim thiab zam rau Das Nias.

10 Tab sis tus tswj cov neeg sam hais rau Das Nias tias :

"Kuv muaj ntsis ntshai peb txiv huab tais, vim nws twb pub kom nej noj nqaij thiab haus cawv. Yog nws pom nej ntsej muag yuag dua cov me nyuam nrog nej nyob ib phaum, mas nws yuav saib tias kuv muaj txhaum vim nej."

11 Das Nias hais rau tus zov keeb uas yog tus tswj cov neeg sam tso ua tus saib Das Nias, As Nas Nias, Mis Xas Ees thiab As Xas Lias tias :

12 "Peb cov me yaus thov koj sim kaum hnub saib, nej muab zaub rau peb noj thiab muab dej rau peb haus xwb.

13 Koj yuav pom peb lub ntsej muag thiab pom cov me nyuam uas noj tus vaj tej qav lub ntsej muag, ces koj mam yuav ua rau peb cov me yaus raws li koj tau pom."

14 Tus saib cov me nyuam pom zoo ua raws li Das Nias lawv thov. Nws thiab cia lawv sim kaum hnub.

15 Dhau kaum hnub tas lawv ntsej muag tshiab tuaj thiab lawv rog dua cov me nyuam noj tus vaj cov qav.

16 Txij ntawd mus, tus saib cov me nyuam tsis muab tus vaj cov dej cawv, zaub mov rau lawv noj, nws tsuas muab zaub rau lawv noj xwb.

17 Tswv Ntuj pub txuj ci thiab tswv yim rau plaub tug hluas ntawd kom lawv txawj ntaub txawj ntawv thiab ua neeg thoob tsib.

Das Nias tseem txawj txhais tej zaj dab ntub npau suav thiab.

18 Thaum txog lub caij tus vaj teem kom cov me nyuam nom ntawd tuaj cuag nws, tus tswj cov neeg sam thiab coj sawv

daws tuaj cuag Nas Npws Kos Dos Nos Xos.

19 Tus vaj nrog lawv tham, nws pom tias nyob hauv pab me nyuam ntawd tsis muaj ib tug thoob tsib cuag Das Nias, As Nas Nias, Mis Xas Ees, thiab As Xas Lias lawv, ces lawv thiaj tuaj nyob ntawm tus vaj xub ntiag.

20 Tus vaj nug lawv txog yam twg mas nws pom tias lawv thoob tsib thiab xyuam xim tshaj cov txiv neeb txiv yaig uas nyob hauv nws lub teb chaws huv tib si kaum npaug.

21 Das Nias nyob hauv lub teb chaws ntawd mus txog thaum Kws Los sawv ua vaj tau ib xyoos.

**Nas Npws Kos Dos Nos Xos ua  
npu suav pom ib tug mlom kub.**

**2 : 1 + 19 - 23 + 31 - 45.**

**2** 1 Xyoo ob uas Nas Npws Kos Dos Nos Xos ua vaj, nws ua npau suav nws ntxhov siab kawg, nws tsaug tsis taus zog.

19 Das Nias ua npau suav hnov Ntuj qhia tej yam npog uas tus vaj Nas Npws Kos Dos Nos Xos yuav nug ntawm nws.

20 Nws cav lus zoo txog tus Tswv nyob saum ntuj, nws qhib ncauj hais tias :

"Xav kom sawv daws cav lus zoo txog Tswv Ntuj lub npe mus tiam dhau tiam, vim kev thoob tsib thiab lub hwj huam yog nws li. 21 Nws yog tus ua kom muaj caij muaj nyog. Nws yog tus txa cov vaj thiab tsa cov vaj. Nws pub kev thoob tsib rau cov thoob tsib. Nws pub txuj ci rau cov txawj xav tom ntej tom qab.

22 Tswv Ntuj ua kom neeg paub tej lus tob lus zais. Nws paub tias muaj dab tsi nyob hauv qhov tsaus ntuj nti. Qhov pom kev nyob txawm hauv nws. 23 Tswv

Ntuj uas kuv tej yawg koob yawg suab tau hwm, kuv thov ua koj tsaug thiab cav txog koj, vim koj tau pub kev thoob tsib thiab pub ib lub zog rau kuv. Koj ua kom kuv paub txog qhov uas peb thov koj. Koj tau qhia tus vaj tej npau suav rau peb paub."

31 Das Nias hais rau tus vaj tias :

"Vaj, koj tau yees pom ib yam tawm tuaj. Koj tau pom ib tug mlom loj loj ci ci kawg sawv nyob ntawm koj xub ntiag. Nws muaj hwj xyeej kawg ntsia tsis taus.

32 Tus mlom ntawd lub taub hau yog tseem kub. Nws lub hauv siab thiab ob txhais npab yog nyiaj. Nws lub plab thiab ob txhais ncej puab yog tooj. 33 Ob txhais ceg yog hlau. Ob txhais ko taw yog hlau xyaw ib nrab av ci.

34 Koj ntsia tus mlom ntawd, koj pom dheev ib lub pob zeb ntog los tsoo tus mlom ob txhais ko taw hlau thiab av sib xyaws tawg tas. Tsis muaj ib txhais tes kov lub pob zeb ntawd li, nws ntog nws los xwb. Nws los ntaus tus mlom, ntaus ob txhais ko taw yog hlau xyaw ib nrab av ci, kom tawg.

35 Ces tus mlom cia li ntais tas tib si. Hlau, av, tooj, nyiaj, kub, txia ua tej lub npluag zoo li cov npluag nplej tom tshav ntaus nplej tas. Cua tuaj, cua muab tshuab ya tas tsis tshuav ib qho li. Lub pob zeb uas ntog los tsoo tus mlom cia li txia ua ib lub roob loj loj puv tas ntiaj teb.

36 Zaj npau suav ntawd yog zoo li no. peb yuav txhais lub ntsiab nyob ntawm tus vaj xub ntiag.

37 Vaj, koj yog tus vaj kas tas tsoom vaj. Tus Tswv Ntuj kav lub ntuj tau pub lub teb chaws rau koj, nws muab hwj huam thiab hwj chim rau koj. 38 Zeej tsoom tej me nyuam, cov tsiaj nyob nruab liaj nruab teb, cov me noog ya saum ntuj lawv nyob qhov twg los ntuj kuj tso rau

hauv koj txhais tes kom koj ua tus vaj kav lawv.

Tus mlom lub taub hau kub yog koj.

39 Yuav muaj dua ib tug vaj sawv lawv koj qab yau dua koj. Thiab tseem yuav muaj dua lwm tus, yog tooj, nws yuav kav tas ntiaj teb.

40 Tseem yuav muaj dua ib tug vaj, yog tus plaub, nws yuav tawv cuag hlau nws yuav tsoo tas puas tsav yam kom tawg ntsoog ua hmoov tas.

41 Ob txhais ko taw uas koj pom yog ib nrab hlau ib nrab av ci, yog ib lub teb chaws neeg tsis sib haum. Lub teb chaws ntawd yuav muaj zog li hlau. Tab sis muaj av thwj cib xyaw rau. 42 Ob txhais taw ib nrab hlau ib nrab av ntawd, yog txhais tias lub teb chaws ib feem tawv, tab sis ib feem muag.

43 Xws li koj tau pom av xyaw hlau, kuj yuav muaj neeg sib txuam, sib xyaws tab sis lawv yuav sib nres tsis tau, ib yam li hlau xyaw tsis tau rau av. 44 Thaum lub caij cov vaj ntawd kav teb chaws, Tus Tswv Ntuj kav lub ntuj yuav tsa ib lub Ceeb Tsheej uas yuav tsis txawj puas thiab yuav tsis poob nyob hauv lwm haiv neeg txhais tes ib zaug. Nws yuav rhuav thiab tsuam cov vaj ntawd tib si. Nws yuav nyob mus li tas ib txhiab ib txhis.

45 Raws nraim li koj tau pom lub pob zeb ntog pem lub roob los uas tsis tau muaj neeg kov, nws ntog los tsoo tooj, av, nyiaj, kub, ntsoog tas. Mas tus Tswv Ntuj loj tau qhia tus vaj txog tej yam yuav tshwm sim yav tom ntej.

Zaj npau suav leej tiag thiab zaj txhais kuj tseeb tiag."

**Peb tug hluas Hes Nplaws nrog  
Das Nias nyob hauv lub qhov hluav  
taws. 3 : 1 - 97.**

**3** 1 Tus vaj Nas Npws Kos Dos Nos Xos nchuav ib tug mlom kub siab rau caum tshim, dav rau tshim. Nws muab tus mlom ntawd txawb rau hauv lub nras Dus Las uas nyob hauv lub ceeb Npas Npis Los.

2 Tus vaj Nas Npws Kos Dos Nos Xos ceeb toom rau cov nom tswj xeev, tswj cheeb, tswj tsheej, tas tsoom pej xeem, cov xov thawj, tsoom tim xyoob, cov nom txiav txim, cov kws Txoj Cai thiab tas tsoom neeg tuaj nyob Npas Npis Los kom sawv daws sib sau tuaj hwm tus mlom uas tus vaj tau tsa. 3 Tas cov neeg uas hais saum no, sawv daws tuaj sib sau nyob ntawm tus mlom xub ntiaj.

4 Ces tus thawj coj xo ceeb toom rau tsoom sid tias :

"HUAB TAIS kom kuv hais li no tuaj rau tsoom pej xeem uas txawv haiv txawv lus. 5 Yog nej hnov raj kub tthis nrov, hnov luag tshuab qeej, tshuab xyu, ntaus thaj cheej thiab hnov tas txhua lub suab raj suab nruas nrov, mas nej yuav tsum kim caug pe tus mlom kub uas tus vaj Nas Npws Kos Dos Nos Xos tau tsa cia.

6 Cov twg tsis kam kim caug pe mas tam sim ntawd lawv yuav raug muab pov rau hauv lub qhov hluav taws kub kub."

7 Ces thaum tsoom pej xeem txawv haiv txawv xeem hnov kiag raj kub tthis nrov, hnov luag tshuab qeej tshuab xyu, ntaus thaj cheej thiab txhia yam suab nrov tuaj, mas sawv daws kim caug pe tus mlom uas tus vaj tau txawb cia. 8 Tab sis muaj tus puav Kas Ntes tau tuaj taug xaiv rau cov Yus Das.

9 Lawv mus hais qhia rau Nas Npws Kos Dos Nos Xos tias :

"Aub ! Vaj ! Koj muaj sia nyob mus ib txhiab ib txhis !

11 Koj tau tshaj Txoj Cai tias tus twg tsis pe tus mlom kub, mas tus twg yuav

raug muab pov rau hauv lub qhov hluav taws kub kub. 12 Ntawm no, muaj ib co Yus Das hu ua Xas Ntas, Mes Sas, As Npes Nes Nkos uas koj tau muab kab xwm rau lawv ua nyob hauv lub ceeb Npas Npis Los, lawv tsis tau mloog koj lus ceeb toom.

Aub ! Vaj ! Lawv tsis tsob hwb koj. Lawv tsis pe tus mlom kub uas koj tau tsa."

13 Nas Npws Kos Dos Nos Xos npau taws ua ib ce liab tas. Nws kom lawv coj Xas Ntas, Mes Sas thiab As Npes Nes Nkos lawv tuaj cuag nws. Ces tam sim ntawd lawv coj tau peb tug hluas Yus Das tuaj txog ntawm tus vaj xub ntiag.

14 Tus vaj nug lawv tias :

"Xas Ntas, Mes Sas thiab As Npes Nes Nkos, lawv hais tias nej tsis kam tsob hwb kuv cov dab, nej tsis kim caug pe tus mlom kub uas kuv txawb cia no. Puas muaj li ntawd tiag ? 15 Thaum nej hnov raj kub tthis nrov, hnov luag tshuab qeej tshuab xyu, ntaus thaj cheej thiab hnov tas txhia lub suab nrov, mas nej puas yuav txhos caug pe tus mlom uas kuv tau ua ? Yog nej tseem tsis pe mas tam sim ntawd yuav muab nej pov rau hauv lub qhov hluav taws kub kub. Saib tus dab twg yuav tuaj cawm nej ntawm kuv txhais tes tau ?"

16 Xas Ntas, Mes Sas, As Npes Nes Nkos lawv teb rau tus vaj tias :

"Tsis tas peb yuav teb koj txog qhov koj nug no. 17 Aub ! Vaj ! Yog peb tus Tswv Ntuj, tus uas peb tsob hwb, nws pab tau peb dim ntawm lub qhov hluav taws kub thiab ntawm koj txhais tes, mas nws yeej yuav pab peb kom dim xwb. 18 Tab yog nws tsis pab, koj yuav tsum paub tias peb yeej tsis tsob hwb koj tus dab thiab peb tsis kam pe tus mlom koj tau tsa !"

19 Tus vaj Nas Npws Kos Dos Nos Xos npau taws heev heev ua ib ce liab tag rau

Xas Ntas, Mes Sas thiab As Npes Nes Nkos lawv. Nws txib neeg kom mus rauv taws hauv lub qhov hluav taws kom kub dua xya npaug tuaj. 20 Thiab nws txib cov neeg muaj zog tshaj nyob hauv nws pab tub rog kom lawv muab Xas Ntas, Mes Sas thiab As Npes Nes Nkos lawv khi thiab pov rau hauv lub qhov hluav taws.

21 Lawv thiaj muab peb tug hluas ntawd pav thiab pov rau hauv lub qhov cub kub kub.

22 Lawv tau ua raws li tus vaj hais. Lub qhov hluav taws kub tas nrho, cov neeg uas lawv muab Xas Ntas, Mes Sas thiab As Npes Nes Nkos pov rau hauv, mas lawv kuj raug nplaim taws kub lawv tuag tas. 23 Xas Ntas, Mes Sas thiab As Npes Nes Nkos lawv poob rau hauv lub qhov hluav taws, lawv tes taw pav tas.

24 Lawv mus mus los los nyob hauv cov nplaim taws, lawv hu nkauj cav txog Tswv Ntuj thiab cav lus zoo txog Huab Tais. 25 As Ntxas Lias sawv hauv nplaim taws, nws cav txog Huab Tais tias :

26 *Huab Tais, peb cov yawg koob tus Tswv Ntuj, peb cav lus zoo txog koj. Koj lub npe muaj koob meej mus ib txhiab ib txhis.*

34 "Huab Tais, koj tsis txhob tso peb pov tseg mus li. Koj nco ntsoov txog koj lub npe. Koj tsis tso lo lus koj tau cog pov tseg.

35 *Koj txhob thim koj lub txiaj ntsim. Koj nco txog koj tus phooj ywg Has Nplas Has, txog koj tus tub txib His Xas Has thiab koj tus Ntshiab His Xas Lais.*

36 *Koj tau cog lus rau lawv tias lawv yuav muaj tub ki coob cuag li cov hnub qub nyob saum ntuj, cuag li cov suab zeb nyob ntawm ntug hiav txwv.* 37 *Huab Tais, hnub no peb yog haiv neeg me tshaj, nyob tas ntiaj teb peb txaj muag vim peb*

- cov txhaum. 38 Nyem no, peb tsis muaj tswv, tsis muaj Yaj Saub, tsis muaj vaj. Peb tsis muaj tsiaj, tsis muaj xyab los txi Ntuj, peb tsis muaj qhov chaw yuav cev paj tshab rau koj, thiab yuav vam txog koj lub txiaj ntsim.
- 39 Tab sis thov koj ntsia txog peb lub siab txom nyem. Peb tus plig tsis muab hlob, thov koj txais ib yam li koj txais cov nyuj 40 cov tthis thiab cov yaj txi rau koj.  
*Hnub no peb thaj txi Ntuj yog zoo li ntawd. Peb thov kom koj zoo siab cia peb los raws koj. Cov tso siab rau koj yuav tsis raug kev poob ntsej muag.*
- 41 Nyem no peb muab tas peb lub siab los raws koj, los hwm koj thiab nrhiav koj lub ntsej muag.
- 42 Koj tsis txhob cia peb poob hauv qhov txaj muag, koj mloog koj lub siab zoo thiab khuv leej. Koj ua zoo rau peb.
- 43 Koj ua hwj huam loj los cawm peb. Huab Tais, koj ua kom sawv daws cav txog koj lub npe."
- 46 Tus vaj cov tub txib muab roj, muab taws los pov rau hauv lub cub tawg ntxiv.
- 47 Cov nplaim taws cig tshwm siab li plaub caug cuaj tshim saum lub ncauj qhov. 51 Ces peb tug hluas piib hu nkauj cav txog HUAB TAIS tias :
- 57 "Tas ib puas tsam yam tawm ntawm Huab Tais txhais tes los, nej cav lus zoo txog Huab Tais, nej dhia cav txog nws mus ib txhiab ib txhis !
- 58 Tas Huab Tais ib tsoom Tshiab, nej cav lus zoo txog Huab Tais, nej dhia cav txog nws mus ib txhiab ib txhis !
- 59 Cov txheej ntuj, nej cav lus zoo txog Huab Tais, nej dhia cav txog nws mus ib txhiab ib txhis !
- 60 Cov dej nyob txheej ntuj saud, nej cav lus zoo txog Huab Tais, nej dhia cav txog nws mus ib txhiab ib txhis .
- 61 Nej sawv daws uas nej muaj hwj huam nyob saum ntuj, nej cav lus zoo txog Huab Tais, nej dhia cav txog nws mus ib txhiab ib txhis !
- 62 Nkauj hnub nraug hli, neb cav lus zoo txog Huab Tais, neb dhia cav txog nws mus ib txhiab ib txhis !
- 63 Tas ib tsoom hnub qub nyob saum ntuj, nej cav lus zoo txog Huab Tais, nej dhia cav txog nws mus ib txhiab ib txhis !
- 64 Cov nag cov lwg, nej cav lus zoo txog Huab Tais, nej dhia cav txog nws mus ib txhiab ib txhis !
- 65 Cov cua, nej cav lus zoo txog Huab Tais, nej dhia cav txog nws mus ib txhiab ib txhis !
- 66 Cov hluav taws qhov kub, nej cav lus zoo txog Huab Tais, nej dhia cav txog nws mus ib txhiab ib txhis !
- 67 Lub caij no, caij sov, nej cav lus zoo txog Huab Tais, nej dhia cav txog nws mus ib txhiab ib txhis !
- 68 Cov nag huab zig, cov kob nag, nej cav lus zoo txog Huab Tais, nej dhia cav txog nws mus ib txhiab ib txhis .
- 69 Cov te txias, cov daus, nej cav lus zoo txog Huab Tais, nej dhia cav txog nws mus ib txhiab ib txhis !
- 70 Cov dej khov, cov npuv, nej cav lus zoo txog Huab Tais, nej dhia cav txog nws mus ib txhiab ib txhis !
- 71 Cov hnub cov hmo, nej cav lus zoo txog Huab Tais, nej dhia cav txog nws mus ib txhiab ib txhis !
- 72 Qhov pom kev qhov tsaus ntuj, nej cav lus zoo txog Huab Tais, nej dhia cav txog nws mus ib txhiab ib txhis !
- 73 Cov kab xob laim cov huab dub, nej cav lus zoo txog Huab Tais, nej dhia cav txog nws mus ib txhiab ib txhis !
- 74 Ntiaj teb nrug cai, nej cav lus zoo txog Huab Tais, nej dhia cav txog nws mus ib txhiab ib txhis !

75 Cov ncov roob siab cov ncov roob qis, nej cav lus zoo txog Huab Tais, nej dhia cav txog nws mus ib txhiab ib txhis !  
 76 Tas ib puas tsav yam tawm ntawm noob los tshwm npoo av, nej cav lus zoo txog Huab Tais, nej dhia cav txog nws mus ib txhiab ib txhis !  
 77 Cov dej txhawv, nej cav lus zoo txog Huab Tais, nej dhia cav txog nws mus ib txhiab ib txhis !  
 78 Cov dej ntuj, cov dej ntws, nej cav lus zoo txog Huab Tais, nej dhia cav txog nws mus ib txhiab ib txhis !  
 79 Cov vaj ntses, cov me ntses khiav hauv dej, nej cav lus zoo txog Huab Tais, nej dhia cav txog nws mus ib txhiab ib txhis !  
 80 Cov noog ya saum ntuj, nej cav lus zoo txog Huab Tais, nej dhia cav txog nws mus ib txhiab ib txhisi !  
 81 Tas ib puas tsav yam tsiaj txhu, nej cav lus zoo txog Huab Tais, nej dhia cav txog nws mus ib txhiab ib txhis !  
 82 Tas ib tsoom neeg nyob ntiaj teb, nej cav lus zoo txog Huab Tais, nej dhia cav txog nws mus ib txhiab ib txhis !  
 83 Tas ib tsoom Leej Choj, nej cav lus zoo txog Huab Tais, nej dhia cav txog nws mus ib txhiab ib txhis !  
 84 Tas ib tsoom neeg teev Tswv Ntuj, nej cav lus zoo txog Huab Tais, nej dhia cav txog nws mus ib txhiab ib txhis !  
 85 Cov neeg siab dawb tswv yim ncaj, nej cav lus zoo txog Huab Tais, nej dhia cav txog nws mus ib txhiab ib txhis !  
 86 Cov neeg siab ntshiab tsis muab hlob, nej cav lus zoo txog Huab Tais, nej dhia cav txog nws mus ib txhiab ib txhis !  
 87 Lub hwj xyeej siab nyob ncig nws, lo lus cav nyob mus li mus txog nws."  
 91 Tus vaj Nas Npws Kos Dos Nos Xos poob siab, nws sawv tsees. Nws hais rau nws cov tub ncig tias :

"Ua cas ? Peb twb muab peb tug hluas ntawd pav tas huv si peb mam muab lawv pov rau hauv hluav taws sad, puas yog ?"

Lawv teb tias :

"Aub ! Vaj ! Yog kawg mas !"

92 Tus vaj hais tias :

"Ua cas kuv yees pom plaub tug neeg tsis pav li, lawv mus mus los los hauv hluav taws, xws li hluav taws tsis kub lawv qhov twg li. Tus plaub muaj ntsis yuav zoo li yog ib tug Tshiab."

95 Nas Npws Kos Dos Nos Xos tsa suab hlo hu tias :

"Xas Ntas, Mes Sas thiab As Npes Nes Nkos lawv tus Huab Tais nto koob meej, nws xa nws tus Tshiab tuaj cawm nws cov tub txib, vim lawv tso siab rau nws.

96 Lawv hla tus vaj cov lus ceeb toom, lawv yeem cia lawv lub cev raug txom nyem dua mus tsob hwb thiab teev lwm tus Tswv Ntuj."

97 Ces tus vaj tsa lawv peb leeg nyob vam meej hauv lub tsheej.

**Nas Npws Kos Dos Nos Xos ua npau suav qhia nws tias nws yuav vwm. 4 : 1 - 31.**

**4** 1 Muaj ib hnub, kuv, uas yog tus vaj Nas Npws Kos Dos Xos kuv nyob hauv kuv kem tsev li txhia hnub, ces kuv ua ib zag npau suav uas kuv tsis paub zaj npau suav ntawd. 2 Ntxhov kuv siab kawg. Hmo ntuj kuv tsis tsaug zog li. 3 Ces kuv hu cov neeg txawj txhais npau suav nyob hauv kuv lub teb chaws tuaj. Tab sis tsis muaj leej twg txawj txhais.

5 Kuv thiaj li hu Das Nias tuaj. Kuv hais rau Das Nias tias :

6 "Das Nias, kuv paub tias cov dab siab ntshiab lub tswv yim nyob hauv koj. Tsis muaj ib yam uas koj yuav tsis paub. Kuv piav kuv zaj npau suav rau koj mloog zoo

## Das Nias, Zaj 4

li no:

7 Muaj ib hnub kuv tsaug zog, kuv pom ib tsob ntoo nyob hauv nruab nrab plawv ntiaj teb. Yog ib tsob ntoo loj kawg.

8 Tsob ntoo ntawd kuj txawj hlob mus zuj zus ntxiv, tsob ntoo siab mus txij ntuj.

9 Nws tej nplooj ntsuab xiab, nws txi txiv ncw ncw. Tus twg kuj tuaj nrhiav txhiam xws noj nyob hauv tso ntoo ntawd. Cov tsiaj tuaj nkaum ntxoo hauv tsob qab ntoo ntawd, cov noog tuaj ua zes nyob saum nws tej ceg.

10 Kuv pom ib tsob ntoo zoo li ntawd. Ces ib sij huam muaj ib tug Tshiab tuaj saum ntuj tuaj. Nws hais tias :

11 Nej ntov tsob ntoo ntawd mas ! Nej lwg tej nplooj, nej de tej txiv, nej txiav tej ceg pov tseg. Nej lawv cov tsiaj kom khiaj tsis txhob nkaum hauv tsob qab ntoo ntawd, nej lawv cov noog kom lawv tsis txhob tuaj ua zes rau saum nws tej ceg.

12 Tab sis nej cia lub hauv paus ntoo nws nyob nws hauv av. Nws yuav nyob xyaw cov nroj nyob tom teb. Niaj hnub cov lwg yuav tsuag los rau saum nws.

13 Nws yuav nyob hauv cov tshav nroj xws li ib tug tsiaj. Nws yuav nyob li ntawd xya xyoo.

14 Ntuj xav kom muaj zoo li ntawd tuaj, ua li mas sawv daws thiaj yuav paub tias tus Huab Tais nyob siab kav tas ib tsoom neeg. Nws nyiam pub yam twg mas nws pub yam twg, nws xav tsa tus neeg me tshaj kom hlob tuaj kuj tau.

15 Das Nias, kuv tau ua npau suav zoo li ntawd. Nyob hauv kuv xeev ntuj tsis muaj leej twg yuav txawj txhais zaj npau suav ntawd. Tab sis koj yuav txhais tau, vim cov dab ntshiab lub tswv yim nyob hauv koj."

16 Tus vaj piav tas li ntawd rau Das Nias, mas Das Nias ntshai. Ces tus vaj

hais rau Das Nias tias :

"Koj txhob ntshai mog !"

Das Nias thiaj li pib hais lus. Nws hais tias :

17 "Aub ! Huab Tais ! Koj tau pom ib tug ntoo loj loj siab txij li ntuj thiab tas lub ntiaj teb pom nws. 18 Tus ntoo muab txhiam xws rau sawv daws noj, sawv daws tuaj nkaum hauv nws.

19 Tus ntoo ntawd yog koj, koj muaj hwj huam, koj siab txij lub ntuj, koj kav tas teb chaws mus txog npoo ntuj. 20 Tab sis ib tug Tshiab Ntshiab tuaj hais tias : Nej ntov tsob ntoo ntawd mog ! Nej cia nws lub hauv paus nyob hauv. Nws yuav nyob xyaw cov nroj nyob tom teb, niaj hnub cov lwg yuav tsuag rau saum nws, nws yuav nrog cov tsiaj nyob xya xyoo.

21 Vaj ! Tus Nyob Siab Tshaj xav qhia koj tias koj yuav tsis tau nrog ib zeej tsoom neeg nyob lawm.

22 Koj yuav mus nrog cov tsiaj nyob. Koj yuav mus nog zaub xws li ib tug nyuj. Cov lwg yuav ntub koj. Koj yuav nyob li ntawd mus txog hnub uas koj nco dheev tias tus Nyob Siab Tshaj yog tus kav ntiaj teb neeg. Nws nyiam tus twg mas nws pub paj tshab rau tus twg.

23 Tab sis tus Tshiab Ntshiab tseem hais tias yuav tsis txhob rho lub hauv paus ntoo ntawd. Vaj, koj xeev ntuj yuav tsis ploj, nws yuav nyob mus txog hnub uas koj nco dheev pom tias Ntuj tswj tas ntiaj teb.

24 Ua li mas, tus Vaj ! Koj txais kuv cov lus ntuas mog ! Koj yuav tso koj cov txhaum pov tseg. Koj ua cov dej num ncaj, koj hlub cov pluag, koj thiaj li yuav tau nyob nyab xeeb ntev xyoo."

25 Muaj txhua yam tshwm sim xws li Das Nias hais.

26 Kaum ob lub hlis tom qab, muaj ib hnub tus vaj mus yos ua si nyob hauv nws

lub loog, nws tab tom hais tias :

27 "Lub tsheej Npas Npis Los loj no yog kuv tsim. Kuv muaj hwj chim kawg. Kuv lub koob meej nto moo lug."

28 Cov lus ntawd tseem tab tom tawm ntawm nws qhov ncauj, ces ib sij huam muaj ib lub suab nrov saum ntuj tuaj tias : "Nas Npws Kos Dos Nos Xos, koj yuav tsis tau ua vaj ntxiv lawm.

29 Koj yuav tsis tau nrog neeg nyob ntxiv. Koj yuav mus nrog cov tsiaj nyob tom teb. Koj yuav mus nrog cov nyuj nog zaub. Tos xya xyoo, koj thiaj yuav rov paub tias tus Nyob Siab Tshaj yog tus tsa neeg ua vaj, nws xav tsa tus twg kuj tau."

30 Ces Nas Npws Kos Dos Nos Xos tsis tau ua vaj ntxiv. Nws mus nyob xya xyoo nyob tom teb, nws nrog cov tsiaj nyob. 31 Thaum txog lub caij Ntuj teem mas tus vaj thiaj mam txawj tsa muag ntsia lub Ntuj, nws rov qab muaj tswv yim tuaj. Nws cav txog tus Nyob Siab Tshaj, nws rov pom tias tus Nyob Siab Tshaj yog tus kav tas ib puas tsav yam.

### **Npas Tas Xas rooj qav. 5 : 1 - 30.**

**5** 1 Tus vaj Npas Tas Xas ua ib roog qav loj rau nws cov nom tswv noj. Kuv yees muaj ib txhiab leej neeg.

2 Tus vaj haus cawv ntau vim cawv qab heev, ces Npas Tas Xas txib kom luag nqa cov tais nyiaj tais kub uas nws txiv Nas Npws Kos Dos Nos Xos txeeb tau hauv lub Tuam Tsev Teev Ntuj nyob Yes Les Xas Les los.

3 Luag thiaj nqa tau cov ntim nyiaj ntim kub uas tuaj ntawm Tswv Ntuj lub Tuam Tsev nyob Yes Lus Xas Les tuaj. Tus vaj thiab cov nom tswv, cov niam yau, cov poj niam hu nkauj lawv tau muab siv ua ntim haus dej haus cawv.

4 Thaum lawv tab tom haus cawv lawv

hais tej zaj qhuas ntxhias cav txog tej tus mlom nyiaj mlom kub, mlom tooj, mlom hlau, mlom zeb mlom ntoo uas lawv niaj hnub teev,

5 ib sij huam lawv pom ib co ntiv tes neeg yees tawm tuaj sau ntawv rau saum phab ntsa ze ntawm ib lub teeb hauv huab tais tsev. Tus vaj tau pom xyeem kiag txhais tes sau ntawv.

6 Ces tus vaj txawm ua ntsej muag puas nyas, nws lub siab poob nthav, nws ib ce muag tas, nws ob lub hauv caug tshee tshee cuag yuav vau.

7 Nws thiaj tsa suab qw hu cov txiv neeb, cov kws Kas Ntes txawj saib tes, cov txawj ntiab dab. Tus vaj hais rau cov tub txawg nyob tas Npas Npis Los tias: "Yog leej twg twm tau cov ntawv no thiab txhais tau lub ntsiab, mas kuv yuav muab tsho tsuj tsho npuag rau nws hnav, muab saw nyiaj saw kub rau nws coj, tus ntawd yuav yog tus nom peb uas saib lub teb chaws."

8 Cov tub txawg hauv lub teb chaws tuaj txhij txhua tab sis tsis muaj ib tug yuav txawj twm cov ntawv ntawd thiab yuav txhais lub ntsiab rau tus vaj mloog. 9 Ua li mas tus vaj Npas Tas Xas lub siab haj yam nyob tsis tus, nws lub ntsej muag ntshaus tas. Cov nom tswv kuj yoob tas tsis pom qab yuav ua zaj twg.

13 Lawv thiaj mus hu Das Nias tuaj. Tus vaj nug Das Nias tias :

"Koj puas yog Das Nias, ib tug nyob hauv pab uas kuv txiv coj Yus Das teb los ?

14 Kuv hnov tias cov dab lub tswv yim nyob hauv koj. Koj muaj kev txawj kev ntse, kev thoob tsib tshaj tas sawv daws

15 Lawv twb coj ntau tus tub txawg, ntau tus txiv neeb txawj ntse tuaj twm cov ntawv no thiab txhais lub ntsiab, tab sis tsis muaj ib tug yuav twm tau cov ntawv thiab txhais rau kuv tau li.

16 Kuv hnov tias koj txawj txhais tej  
yam zoo li ntawd. Yog tias koj twm tau  
thiab txhais tau cov ntawv no rau kuv tau  
mas kuv yuav muab tsho tsuj tsho npuag  
rau koj hnav, muab saw nyiaj saw kub rau  
koj coj thiab koj yuav yog tus nom peb  
saib lub teb chaws."

17 Das Nias tsa ncauj hais rau tus vaj  
tias :

"Cia muab koj cov paj tshab los pub rau  
lwm tus. Kuv tsuas twm cov ntawv no  
thiab txhais lub ntsiab rau koj xwb.  
22 Tab yog koj tau paub tej yam tsis zoo  
uas koj txiv tau ua los lawm, tsis kav koj  
siab tseem tsis nqig.

23 Koj tseem tsa koj siab txij li tus Huab  
Tais kav lub ntuj. Koj tau txib kom luag  
nqa cov twj nyob hauv Huab Tais lub  
Tuam Tsev los rau koj thiab koj cov nom  
tsvv, cov niam yau thiab cov poj niam hu  
nkauj, nej tau muab rau dej rau cawv haus  
cav txog nyias cov mlom nyiaj mlom kub,  
mlom ntoo uas lawv lub pob ntseg tsis  
hnov lus, qhov muag tsis txawj pom, lus  
los tsis txawj hais. Koj tsis tau cav txog  
tus Tswv Ntuj uas nws tuav rawv koj txoj  
sia rau hauv nws txhais tes thiab nws coj  
koj mus kev.

24 Tswv Ntuj thiaj tau xa txhais tes  
ntawd tuaj sau cov ntawv no.

25 Cov ntawv no nyeem raws li no, Maws  
Mes, Taws Kes, Pas Xis.

26 Cov lus ntawd txhais li no : Maws  
Kes, yog tias : Tswv Ntuj tau ntsuas koj  
lub teb chaws thiab tau muab pub rau  
luag tej lawm.

27 Taws Kes, yog tias : Tswv Ntuj tau  
luj koj saum teev. Koj lub cev sib dhau  
lawm.

28 Pas Xis, yog tias : koj lub teb chaws  
yuav faib ua ob sab, ib sab yog cov Mes  
Dias, ib sab yog cov Pes Xis."

29 Ces Npas Tas Xas thiaj kom lawv

muab tsho tsuj tsho npuag rau Das Nias  
hnav, muab saw nyiaj saw kub rau Das  
Nias coj thiab tsa Das Nias ua tus nom  
peb nyob hauv lub teb chaws.

30 Hmo ntawd kiag, tus vaj Npas Tas  
Xas uas kav Kas Ntes teb, nws raug luag  
muab nws tua tuag.

**HUAB TAIS cawm Das Nias ntawm  
ncauj tsov. 6 : 11 - 28.**

**6** 11 Das Nias hnov tias tus vaj txiav  
txim rau nws, mas nws mus saum  
nws kem tsev pw uas cov qhov rais yog  
tig ntsia rau sab Yes Lus Xas Les. Niaj  
hnub nws mus txhos caug thov Tswv Ntuj  
peb zaug. Ib txwm nws ua kam li ntawd.  
12 Cov thawj tub rog muaj coob leej tuaj  
pom Das Nias teev Ntuj.

13 Ces lawv mus hais rau tus vaj tias :  
"Aub ! Vaj ! Koj puas tau sau yuas rau ib  
Txoj Cai tias, yog leej twg teev ib tug dab  
dab tsi kuj xij, tsuav tsis yog teev koj,  
mas tus ntawd yuav raug muab pov rau  
hauv lub nkuaj tsov. Koj tau sau Txoj Cai  
ntawd tiag los tsis tau ?"

Tus vaj teb tias :

"Tau sau tas thiab txiav tas tib si, raws li  
cov Mes Dias thiab cov Pes Xis Txoj Cai  
uas yuav hla tsis tau li."

14 Ces lawv hais rau tus vaj tias :

"Das Nias uas yog ib tug nyob hauv cov  
Yus Das, nws tsis quav ntsej txog koj  
thiab txog qhov koj txwv kiag li ! Ib  
hnub, nws mus ua nws zaj teev Ntuj peb  
zaug."

15 Tus vaj hnov cov lus no, nws tu siab  
tas nrho thiab nws cog lus tias nws yuav  
nrhiav ib txog kev cawm Das Nias. Ib  
hnub tsaus ntuj ntais, tus vaj nrhiav ib  
txog kev tso Das Nias kom Das Nias  
txhob raug txim. 16 Tab sis tsoom siv  
tuaj txob tus vaj ntsuag qees tias :

"Aub ! Vaj ! Koj yuav paub tias raws li cov Mes Dias thiab cov Pes Xis Txoj Cai mas thaum tus vaj tshaj los txwv ib yam mas yuav hla tsis tau.

17 Tus vaj txib kom coj Das Nias tuaj thiab kom muab nws pov rau hauv nkuaj tsov."

Tus vaj hais rau Das Nias tias :

"Koj tus HUAB TAIS uas koj rau siab tsob hwb nws mas yog nws yuav cawm koj."

18 Lawv nqa ib lub pob zeb los tso rau ntawm rooj nkuaj tsov. Tus vaj ntaus nws lub thwj thiab cov nom lub thwj rau, kom tsis txhob hloov dab tsi txog Das Nias kev raug txim.

19 Tus vaj rov mus hauv nws lub tsev, tus vaj yoo mov ib hmos thiab tsis kheev nws cov poj niam los nrog nws pw. Tas ib hmos nws tsaug tsis taus zog me me li.

20 Kaj ntug txoog xwb, tus vaj sawv tsees thiab nws maj nroos mus tom nkuaj tsov.

21 Mus txog ntawm lub nkuaj tsov, nws hu Das Nias tias :

"Das Nias ! Koj yog tus Tswv Ntuj muaj txoj sia tus tub txib ! Tus Tswv Ntuj uas koj muab siab rau tsob hwb nws, mas nws puas tau tuaj cawm koj ntawm ncauj tsov ?"

22 Das Nias teb tus vaj tias :

"Aub ! Vaj ! Tseev kom koj txoj sia ntev mus li ! 23 Kuv tus Tswv Ntuj tau xa nws tus Tshiab tuaj kaw tsov qhov ncauj lawm, tsis tau muaj dab tsi ua xwv txheej rau kuv, vim HUAB TAIS pom tias kuv tsis tau ua dab tsi txhaum. Koj kuj tsis pom kuv muaj txhaum thiab."

24 Tus vaj zoo siab hlo, nws ceeb toom kom lawv tso Das Nias tawm los. Ces lawv tso Das Nias tawm los, nws tsis raug qhov twg sab li vim nws ntseeg txog Tswv Ntuj. 25 Tus vaj hu cov neeg hiam

rau Das Nias tuaj. Nws muab lawv thiab lawv tej poj niam me nyuam pov rau hauv nkuaj tsov. Lawv tseem poob tsis tau txog hauv av, mas tsov twb dhia tuaj huas lawv tas, twb ua lawv tej pob txha ntsoog tag.

26 Ces tus vaj Das Lis Yus sau ntawv tshaj tas rau txhia haiv neeg txhia xeem lus nyob saum ntiaj teb no tias :

"Kev thaj yeeb ntws lug los rau saum nej ! 27 Kuv ceeb toom tias nyob tas cov teb chaws uas kuv kav, nej yuav ntshai nyob ntawm Das Nias tus Tswv Ntuj xub ntiag. Nws yog tus Tswv Ntuj muaj txoj sia nyob mus li. Nws lub ceeb tsheej yuav tsis txawj puas, tsis txawj kawg. 28 Nws cawm thiab npo neeg, nws ua hwj huam zoo nkauj nyob saum ntuj thiab nyob ntiaj teb. Nws npo Das Nias ntawm tsov lub peev xwm."

**Das Nias ua npau suav pom plaub tug tsiaj. 7 : 1 - 14.**

**7** 1 Xyoo tim ib uas Npas Tas Xas ua vaj kav Npas Npis Los, mas Das Nias ua npau suav. Nws sau tej zag npau suav tseg rau hauv ntawv.

2 Das Nias piav zaj zoo li no :

"Hmo ntuj kuv tau ua npau suav pom tej Yam zoo li no : Muaj plaub nthwv cua tuaj plaub ceg kaum ntuj tuaj ntsawj lub hiav txwv. 3 Plaub tug tsiaj loj loj tawm hauv lub hiav txwv los, ib tug zoo txawv ib tug.

4 Thawj tus tsiaj zoo xws li ib tug tsov, muaj tis xws li dav. Kuv ntsia tus tsov ntawd, ua ciav ib me ntsis cov tis cia li poob tas, thiab nws sawv hauv av los, nws ob txhais ceg sawv ntsug xws li neeg, ces muaj ib lub plawv neeg los nyob hauv nws.

5 Kuv txawm pom dua lwm tus tsiaj

txawv dua thawj tug. Tus ntawd zoo xws li ib tug dais. Nws zaum thiab kwv peb tug tav twm ntawm qhov ncauj. Ib lub suab hais rau nws tias : "Koj sawv mus noj nqaij kom tas ntau ntau mas !"

6 Kuv ntsia, ces kuv ho pom dua ib tug tsiaj, zoo li tus tsov pom txwv, tuaj plaub tug tis ntawm ob sab ntsag thiab nws muaj plaub lub taub hau. Ces nws tau txais kev muaj hwj huam.

7 Hmo ntawd, kuv tseem rov ua npau suav pom dua ib qho ntxiv, kuj yog dua ib tug tsiaj. Nws muaj zog kawg, nws muaj hwj xyeej ua txaus ntshai tas nrho. Nws cov hniav yog ib co hniav hlau loj loj kawg. Nws noj dab tsis mas nws muab zom muab xo tawg tas, tej qhov tsis zoo noj nws muab tsuj ntiag rau hauv av. Tus tsiaj ntawd txawv tas nrho peb tug uas kuv xub pom ua ntej. Tus ntawd nws tuaj kaum tus kub.

8 Kuv tseem ntsia ntsia cov kub ntawd, ces txawm tuaj kiag ib tug kub ntxiv. Tus no me me. Muaj peb tug kub loj cia li rho hlo tawm cia chaw rau tus me nyob. Ua ciav tus kub ntawd muaj qhov muag xws li qhov muag neeg, thiab muaj qhov ncauj, nws hais tej yam loj tas nrho.

9 Kuv ntsia, kuv txawm pom muaj ib co theej kiab txawb ntawd, thiab muaj ib tug neeg laus los zaum hauv. Nws cov ris tsho dawb cuag daus, nws cov plaub hau huv cuag plaub yaj. Nws lub theej kiab yog nplaim taws, muaj ib co log hluav taws.

10 Muaj ib tug dej yog hluav taws txhawv ntws lug ntawm nws xub ntiag los. Txhiab vam leej tsob hwb nws. Tas txhiab vam leej puav leej sawv ntsug nyob ntawm nws xub ntiag. Nws qhib lub rooj txiat txim, tej ntawv twb nthuav tas.

11 Kuv ntsia ntsia, kuv hnov tej yam loj

uas tus kub hais. Thaum kuv ntsia kuv pom lawv cia li muab tus tsiaj tua kiag thiab muab nws lub cev pov rau hauv hluav taws.

12 Thawj peb tug tsiaj tau poob hwj huam xwb. Lawv tseem muaj txoj sia nyob ib nt us ntxiv.

13 Hmo ntuj kuv ua npau suav pom tej ntawd, thiab kuv pom tej yam tuaj nyob saum cov huab zoo li ib tug neeg Leej Tub, nws txav los ze ntawm tus Laus, nws mus txog ntua ntawm tus Laus xub ntiag.

14 Neeg Leej Tub txais lub hwj huam, lub koob meej thiab kev ua vaj. Tas txhia haiv neeg, txhia kuj cuab, txhia xeem lus tsob hwb nws. Nws lub tuam teb yog ib lub tuam teb nyob mus li tsis txawj kawg. Nws lub teb chaws yuav tsis raug kev piam tseem.

**Txhais zaj npau suav plaub tug tsiaj. 7 : 15 - 27.**

15 "Kuv, Das Nias, kuv poob siab tas, tej yam kuv ua npau suav pom ntawd ua kom kuv ntxhov siab tas.

16 Kuv thiaj mus nug ib tug neeg nyob ntawd kom nws txhais lub ntsiab tseeb hais txog tej ntawd rau kuv. Nws teb kuv thiab nws txhais lub ntsiab rau kuv tias :

17 "Plaub tug tsiaj loj loj ntawd yog plaub tug vaj yuav sawv hauv ntiag teb los.

18 Cov uas txais lub ceeb tsheej yog Leej Nyob Siab Tshaj cov Ntshiab. Lawv yuav txais lub ceeb tsheej ua lawv tug mus tas ib txhiab ib txhis."

19 Kuv kuj nug txog lub ntsiab ntawm tus tsiaj uas nws muaj hniav hlau, muaj rau taw tooj thiab muaj hwj xyeej kawg, nws noj tej yam nws muab zom muab xo tawg tas huv si thiab muab tsuj hauv av.

20 Kuv nug txog kaum tus kub tuaj nyob

saum nws taub hau, txog tus kub uas hlav tuaj thiab muaj peb tug cia li lov lawm. Kuv nug txog tus kub ntawd muaj qhov muag muaj qhov ncauj txawj hais tej yam loj tas nrho thiab nws muaj tsim dua cov huv si. 21 Kuv ntsia tus kub ntawd ua rog rau cov Ntshiab thiab nws yeej lawv. 22 Nws ua li ntawd mus txog thaum tus Laus tuaj txiav txim zoo rau Leej Nyob Siab Tshaj cov Ntshiab, ces thiaj txog lub caij cov Ntshiab txais lub ceeb tsheej los ua lawv tug.

23 Tus neeg ntawd teb tias :

"Tus tsiaj tim plaub ntawd yog ib lub teb chaws yuav sawv los kav ntiaj teb, nws yuav txawv tas cov teb chaws muaj vaj. Tus tsiaj ntawd yuav noj tas lub ntiaj teb thiab yuav muab tsuj lwj tas hauv av.

24 Ntawm kaum tus kub mas yog hais tias nyob hauv lub teb chaws ntawd yuav sawv kaum tus vaj thiab yuav muaj dua ib tug lawv cov vaj qab. Nws yuav t xo peb tug vaj. 25 Nws yuav hais lus thuam Leej Nyob Siab Tshaj, thiab yuav sim cov Ntshiab. Nws yuav xav hloov lub caij thiab Txoj Cai. Cov Ntshiab yuav nyob hauv nws tes ib lub zim txwv, thiab ib co zim txwv thiab ib nrab zim txwv."

26 Tab sis luag yuav txiav txim rau nws thiab nws lub hwj huam yuav poob, yuav ploj mus kom tas nrho.

27 Ces lub teb chaws thiab txoj kev ua nom ua vaj nyob tas lub qab ntuj yuav yog tus Nyob Siab Tshaj tsoom ntshiab tug. Leej Nyob Siab lub tuam teb yuav nyob mus ib txhiab ib txhis. Tas txhua tuam teb yuav tsob hwb nws thiab yuav mloog nws.

**Das Nias thov kom HUAB TAIS zam rau nws haiv neeg.**

**9 : 1 - 10 + 15 - 19.**

**9** 1 Xyoo ib uas Das Lis Yus ua vaj, kuv thov Tswv Ntuj thiab lees txhaum zoo li no :

3 "Kuv tus HUAB TAIS Tswv Ntuj, koj thiaj loj thiab muaj hwj xyeej ! Koj ua raws li lo lus koj cog thiab koj pub koj txiaj ntsim rau cov neeg uas nyiam koj thiab coj koj cov lus qhia. 4 Peb tau ua txhaum, tau ua tsis ncaj, peb tau ua phem, peb ntxeev siab, peb tau ncaim ntawm koj cov lus qhia thiab ntawm cov lus koj txiav.

6 Peb tsis tau mloog koj cov tub txib, cov Yaj Saub, uas lawv sawv koj chaw hais lus rau peb cov vaj peb cov nom, rau peb cov yawg koob rau tas haiv neeg nyob hauv lub teb chaws.

7 Huab Tais, yog koj tau kev ncaj, yog peb tau kev txaj muag, peb sawv daws uas nyob Yus Das, nyob Yes Lus Xas Les, tas cov His Xas Lais nyob deb nyob ze nyob tas qhov txhia chaw uas koj ntiab peb mus nyob, vim peb tsis mloog koj lus. Peb sawv daws tau kev txaj muag.

8 HUAB TAIS, tos peb thiab peb cov vaj, peb cov nom, peb cov yawg koob sawv daws tau kev txaj muag los yog vim peb tau ua txhaum rau koj.

9 Peb thov kom peb tus Huab Tais Tswv Ntuj khuv leej peb thiab zam txhaum rau peb, vim peb tau ntxeev siab rau nws.

10 Peb tsis mloog peb tus HUAB TAIS Tswv Ntuj lub suab. Peb tsis tau mus raws li nws tej kev cai lij choj uas cov Yaj Saub, nws cov tub txib, tau qhia rau peb. 15 Peb tus Huab Tais Tswv Ntuj, yav thaud koj txhais tes muaj zog tau pab koj tsoom pej xeem kom lawv dim ntawm Hais Nkws Tos teb los. Koj lub npe nto moo lug txog tav no. Nyem no peb tau ua txhaum, peb ua txoj phem lawm.

16 Huab Tais, koj yog tus siab ncaj, thov koj txhob npau taws rau Yes Lus Xas Les,

uas yog koj lub roob ntshiab. Vim peb tau ua txhaum lawm, thiab peb cov yawg koob kuj tau ua txhaum ntau, mas cov neeg nyob ncig peb lawv thuam peb.

17 Aub ! Peb tus Tswv Ntuj, thov koj mloog koj tus tub txib hu txog koj ! Koj ua kom koj lub ntsej muag rov ci ntsa iab nyob saum koj lub Tsev Ntshiab uas nphob xuav lawm.

18 Kuv tus Tswv Ntuj, koj tig ntsej los mloog kuv mog ! Koj rua muag ntsia peb raug kev ntsaj kev quaj, koj ntsia lub nroog uas cov neeg hu txog koj lub npe lawv nyob hauv. Tsis yog vim peb tau ua tej Yam hauj lwm ntshiab mas peb thiab muaj cuab kav tso peb cov lus thov rau ntawm koj xub ntiag. Yog vim koj lub siab khuv leej neeg zoo tas nrho.

19 Huab Tais, thov koj mloog ! Huab Tais thov koj zam txhaum ! Huab Tais, koj zov rawv, koj ua koj cov hauj lwm ! Koj txhob ncu a ntev ! Vim koj lub nroog thiab koj tsoom pej xeem hu txog koj lub npe !

**Lub caij sawv rov los thiab txiav txim. 12 : 1 - 4.**

**12** 1 Txog lub zim txwv ntawd mas tus vaj txheeb loj Miv Kas yuav sawv los nyob ze koj tsoom pej xeem huab hwm. Yuav yog ib lub caij txhawj xeeb tshaj plaws uas ib txwm txij thaum muaj neeg xeeb los nyob ntiag teb no tsis tau pom dua ib zaug. Lub zim txwv ntawd koj tsoom pej xeem uas lawv muaj lub npe sau cia rau hauv phau ntawv lawv yuav dim.

2 Cov pw tsaug zog hauv teb chaws plua tshauv plua av yuav rov tsim los ntau leej. Ib txhia yuav tau txoj sia nyob mus li, ib txhia yuav raug poob ntsej muag, raug kev txom nyem mus ib txhiab mus ib

txhis.

3 Cov kws txawj kws ntse yuav ci ntsa iab xws li hauv ntuj ntsa. Cov tau qhia txoj kev ncaj kev ncees coob leej yuav ci ntsa iab mus ib sid xws li cov hnub qub.

4 Das Nias, koj khaws cov lus no cia, koj ntaus thwj kaw phau ntawv mus txog lub zim txwv kawg.

**Xus Xas Nas. 13 : 1 - 64.**

**13** 1 Thaud, nyob Npas Npis Los, muaj ib tug txiv neej hu ua Yuas Kis. 2 Nws yuav ib tug poj niam hu ua

Xus Xas Nas, yog Es Xias tus ntxhais. Xus Xas Nas yog ib tug poj niam zoo nkauj kawg. Nws hwm Tswv Ntuj zoo,

3 Vim nws niam nws txiv yog neeg ncaj, nkawd tu nkawd tus ntxhais hlob nyob hauv Mais Xes Txoj Cai.

4 Yuas Kis yog ib tug neeg nplua nuj heev. Nws muaj ib lub loog xov ncig nws lub tsev. Thiab cov Yus Das kheev tuaj tsham nws coob, vim sawv daws saib nws zoo tshaj tej.

5 Xyoo ntawd, tsoom pej xeem tau xaiv ob tug laus neeg los ua txwj laus txiav txim. Ntawv hais txog ob tug txwj laus ntawd tias:

"Txoj kev phem tuaj nyob hauv Npas Npis Los. Yog tuaj ntawm cov txwj laus thiab ntawm cov coj tsoom pej xeem tuaj."

6 Ob tug txwj laus ntawd tuaj ua kab xwm nyob hauv Yuas Kis tsev. Leej twg muaj plaub muaj ntug hais mas tuaj cuag nkawd nyob hauv Yuas Kis tsev.

7 Niaj hnub thaum tav su sawv daws mus tsev tas, mAs Xws Xas Nas tawm tuaj yos ua si nyob hauv nws tus txiv lub loog.

8 Ob tug txwj laus ntawd niaj hnub pom Xus Xas Nas mus yos ua si li ntawd, mas nkawd pib ntshaw txog Xus Xas Nas,

- 9 ua kom nkawd lub tswv yim mooj tas. Nkawd tsis nco txog Ntuj lawm, tsis ntshai Ntuj yuav txiav txim rau nkawd.
- 10 Nkawd ob leeg ntshaw li ntawd, tab sis ib leeg tsis hais qhia rau ib leeg.
- 11 Nkawd txaj muag sib qhia tias nkawd xav nrog Xus Xas Nas pw.
- 12 Tab sis niaj hnub nkawd ua kom nkawd tau pom Xus Xas Nas ib pliag.
- 13 Muaj ib hnub, thaum lub caij nkawd yuav rov mus tsev tav su, nkawd hais tias: "Wb mus tsev. Txog caij noj sus lawm." Ces nkawd nyias mus nyias txoj xub ke.
- 14 Tab sis mus me ntsis xwb nkawd ob leeg rov qab, nkawd rov los sib ntsib, ces thaum ntawd nkawd yuav tsum sib qhia tias vim li cas nkawd thiaj li rov los li ntawd. Nkawd sib qhia tias nkawd ob leeg xav zes Xus Xas Nas, ces nkawd thiaj sib haum xeeb tias yuav nrhiav ib lub caij zoo uas Xus Xas Nas nws nyob nws ib leeg xwb. Nkawd yuav mus nyas Xus Xas Nas.
- 15 Nkawd thiaj tos lub sij hawm zoo ntawd. Muaj ib hnub, Xus Xas Nas thiaj nrog nws ob tug ntxhais txib tuaj yos ua si hauv lub loog xws li txhia zaus. Sov Sov, ces nws xav da dej nyob hauv lub loog.
- 16 Tsis muaj ib tug neeg li. Tab sis ob tug txwj laus nkawd nkaum nyob ze ntawd lawm, nkawd nyas Xus Xas Nas.
- 17 Xus Xas Nas hais rau nws ob tug ntxhais txib tias : "Neb mus nqa cov roj tsw qab tuaj rau kuv. Neb mus mas neb kaw lub rooq loog zoo, kuv xav da dej."
- 18 Ob tug ntxhais txib ua raws li Xus Xas Nas hais. Nkawd kaw lub rooq loog rau thiab nkawd nkag ntawm lub qhov rooq yau nyob ib sab mus dua hauv tsev mus nqa roj lawm. Nkawd tsis paub tias ob tug txwj laus nkaum nyob ntawd.
- 19 Ob tug ntxhais txib nyuam qhuav ploj ntais dua hauv tsev lawm, ob tug txwj laus cia li tawm plaws los tuav Xus Xas Nas thiab hais tias :
- 20 "Lub rooj loog kaw zoo zoo lawm, tsis muaj neeg yuav pom peb. 21 Wb nyiam koj, koj nrog wb pw ! Yog koj tsis kam mas wb yuav ntxo tias muaj ib tug hluas nrog koj nyob, vim li ntawd mas koj thiaj kom koj ob tug ntxhais txib rov mus tsev lawm."
- 22 Xus Xas Nas seev tias : "Ab ! Ua cas ! Txog qhov twg los kuv kev tws tas ! Yog kuv mloog neb mas kuv yuav tuag. Yog kuv tsis mloog los kuv yuav tsis tau kev dim ntawm neb.
- 23 Tab sis kuv yeem raug neb liam dua nrog neb ua txhaum nyob ntawm kuv tus Huab Tais xub ntiag !"
- 24 Ces Xus Xas Nas thiaj quaj qw nrov nrov hu neeg. Ob tug txwj laus kuj qw ntthe qw ntthe rau Xus Xas Nas thiab.
- 25 Ib tug txawm khiav ntsuj mus qhib lub rooj loog.
- 26 Thaum cov neeg hnov qw li ntawd hauv lub loog tuaj, sawv daws khiav tuaj xyuas saib muaj tus xwm dab tsi.
- 27 Ces ob tug txwj laus piav nkawd zaj rau cov tub txib mloog. Cov tub txib thiaj tsis xav mloog thiab xu siab vim Xus Xas Nas tsis tau ua dua ib zaug dab tsi phem kom luag tej hais nws.
- 28 Tag Kis los, sawv daws tuaj sib sau nyob hauv Yuas Kis tsev. Ob tug txwj laus kuj tuaj thiab. Nkawd lub siab nco ntsoov txog qhov phem xwb, nkawd xav kom Xus Xas Nas tuag.
- 29 Nkawd hais rau sawv daws tias : "Nej coj Xus Xas Nas uas yog Es Xias tus ntxhais thiab yog Yuas Kis poj niam tuaj."
- Ces lawv mus hu Xus Xas Nas.
- 30 Xus Xas Nas nrog nws cov me nyuam, nws cov kwv tij neej tsa huv si

- tuaj. 31 Xus Xas Nas ntsej muag soob xais zoo nkauj rhib.
- 32 Thaum nws tuaj mas nws muab ib daig ntaub los npog nws ntsej muag. Ob tug txwj laus siab phem kom nws yaws daim ntaub kom nkawd tau ntsia Xus Xas Nas lub ntsej muag kom txaus nkawd siab.
- 33 Xus Xas Nas tsev neeg quaj tas tib si thiab cov neeg nyob ntawd sawv daws kuj quaj.
- 34 Ob tug txwj laus sawv thiab nkawd tsa tes rau saum Xus Xas Nas taub hau.
- 35 Xus Xas Nas kua muag poob, nws tsa muag ntsia txog ntuj, nws tso siab lug rau Tswv Ntuj.
- 36 Ob tug txwj laus thiaj piav tias : "Nag, wb taug taug kev ua si hauv lub loog, wb ob leeg xwb. Wb pom tus poj niam ntawd nrog ob tug ntxhais txib tuaj. Nws kaw rooj loog tas ces nws kom ob tug ntxhais txib rov qab mus tsev.
- 37 Ces ib tug hluas nraug nkaum nyob ntawd txawm tawm los. Nws thiaj mus nrog tus poj niam ntawd pw.
- 38 Wb nyob tom ib sab, wb pom nkawd ua phem li ntawd ces wb thiaj khiav mus ntes nkawd.
- 39 Wb tau pom nkawd ob leeg ua ke tiag, tab sis wb ntes tsis tau tus hluas nraug, vim nws muaj zog dua wb. Nws qhib plho qhov rooj ces nws cia li khiav lawm.
- 40 Wb ntes tau tus poj niam xwb. Wb nug nws tias tus hluas nraug yog leej twg. Tab sis nws tsis xav qhia wb.
- 41 Wb tau pom zoo li ntawd." Ob tug ntawd kam yog ob tug txwj laus txiav txim diam, mas sawv daws kuj ntseeg nkawd. Ces lawv txiav txim tias Xus Xas Nas yuav tsum tuag.
- 42 Xus Xas Nas thiaj hais nrov nrov tias : "Tswv Ntuj nyob mus li, koj paub tas ib puas tsav yam, tej yam zais ntshis los koj paub tas, ib qho tsis tau tshwm sim tuaj los koj twb xub paub lawm.
- 43 Koj paub tias ob tug ntawd liam ib qho dag rau kuv. Nyem no kuv tuag, koj paub tias kuv tsis tau ua txhaum xws li lawv lub siab phem xav muab liam rau kuv."
- 44 Huab Tais hnov Xus Xas Nas lub suab thov.
- 45 Thaum lawv coj Xus Xas Nas mus rau ntawm thaj chaw lawv yuav tua Xus Xas Nas, mas Huab Tais tshoj ib tug me nyuam tub hu ua Das Nias uas nws muaj ib lub tswv yim ntshiab.
- 46 Das Nias thiaj qw tias : "Kuv tsis xav ua kom tus poj niam ntawd cov ntshav paim. Kuv tsis xav ua txhaum."
- 47 Sawv daws tig ntsia Das Nias, lawv nug nws tias : "Koj xav hais dab tsi li ntawd ?"
- 48 Ces tus tub hluas sawv, nws hais tias : "His Xas Lais tsoom me nyuad, ua cas nej yuav ruam ua luaj ! Nej muab txim rau ib tug ntxhais His Xas Lais, nej twb tsis tau tshuaj lus, nej twb tsis paub dab tsi txog nws meej li !
- 49 Nej sawv daws rov qab mus tom tsev txiav txim tso, vim ob tug neeg ntawd liam ib qho tsis yog rau tus poj niam ntawd."
- 50 Sawv daws thiaj rov mus hauv tsev txiav txim. Cov txwj laus hais rau Das Nias tias :
- "Koj los nrog peb zaum ua ke, thiab koj qhia koj lub tswv yim rau peb. Ntuj twb pub ib lub hwj chim phim cov laus rau koj."
- 51 Das Nias hais rau lawv tias : "Nej tsis txhob cia ob tug ntawd nyob ua ke. Kuv yuav nug nkawd ib leeg zuj zus."
- 52 Ces lawv muab ob tug txwj laus sib faib. Das Nias thiaj hu ib tug los. Das Nias nug nws tias : "Koj yog ib tug neeg laus laus nyob hauv txoj kev txhaum xwb. Koj mloog kuv

hais cov txhaum koj ua kam.

53 Koj txiav txim tsis ncaj, koj muab txim rau cov neeg siab dawb, koj tso cov neeg txhaum mus. Huab Tais twb qhia tias koj yuav tsis txhob muab tus neeg siab dawb siab ncaj tua.

54 Yog koj tau pom tseeb tiag no, koj qhia peb saib koj pom nkawd nyob ua ke hauv tsob qab ntoo twg ?"

Tus txwj laus teb tias :

"Nyob hauv ib tsob qab ntoo paj haum tsav."

55 Das Nias hais tias :

"Kuv hais tseeb, koj lo lus dag yuav rov raug koj taub hau. Tswv Ntuj tus tshiab twb paub tias Tswv Ntuj txiav txim lawm, tuaj txiav koj lub cev ua ob ya."

56 Das Nias tso tus ntawd tawm mus. Nws hu tus ob los, nws hais tias :

"Koj yog caj ces Kas Nas Has, tsis yog caj ces Yus Das ! Poj niam lub cev zoo nkauj ua kom koj tsaus muag. Kev ntshaw ua kom koj lub siab phem tuaj.

57 Neb zes cov ntxhais His Xas Lais tau ntev los lawm. Lawv ntshai neb ces lawv thiaj nrog neb ua txhaum. Tab sis nyem no ib tug ntxhais Yus Das nyiaj tsis taus neb qhov txhaum !

58 Koj sim hais rau kuv saib koj pom nkawd nyob hauv tsob qab ntoo twg ?"

Nws teb tias :

"Nyob hauv ib tsob qab ntoo paj huab poob."

59 Das Nias hais tias :

"Kuv hais tseeb, koj lo lus dag yuav rov raug koj taub hau thiab. Tswv Ntuj tus Tshiab tuav ib rab ntaj tos yuav txiav koj lub cev ua ob ya xwb, kom neb ob leeg txhob tau nyob ua neeg ntxiv."

60 Ces tas lub txoos qw nrov nrov cav txog Tswv Ntuj uas nws cawm cov neeg tso siab rau nws. 61 Sawv daws tig los cem ob tug txwj laus. Vim Das Nias tau

ua kom nkawd lub ncauj lees tias nkawd tau liam li ntawd tiag.

62 Raws li Mais Xes Txoj Cai mas nkawd yuav tsum raug lub txim uas nkawd xav muab rau Xus Xas Nas. Ces lawv muab ob tug txwj laus ntawd tua. Hnub ntawd, Ntuj tau txuag ib tug neeg siab dawb roj ntsha.

63 Xus Xas Nas niam thiab txiv ua Tswv Ntuj tsaug, vim tsis tau muaj ib qho phem nyob hauv nkawd tus ntxhais Xus Xas Nas. Yuas Kis thiab cov kwv tij neej tsa sawv daws kuj ua tsaug.

64 Txij hnub ntawd los, tas tsoom pej xeem saib Das Nias yog ib tug loj.

### **Das Nias tua tus dab Npes thiab tus huab tais zab. 14 : 28 - 42.**

**14** 28 Nyob hauv lub nroog Npas Npis Los, tsoom pej xeem huab hwm ntxeev siab rau lawv tus vaj. Lawv hais tias :

"Tus vaj txia ua ib tug neeg Yus Das. Nws cia Das Nias rhuav peb tus dab Npes tus mlom. Nws cia Das Nias muab peb tus nab tua. Tus vaj kom muab peb cov Leej Choj tua pov tseg. 29 Tsoom pej xeem mus hais rau tus vaj tias :

"Thov koj tso Das Nias rau hauv peb txhais tes. Yog koj tsis kam tso Das Nias rau peb, mas peb yuav muab koj thiab koj poj niam me nyuam tua pov tseg tas huv si."

30 Tus vaj paub tias lawv npau taws heev rau nws, nws ntshai, nws yuav tsum tso Das Nias rau lawv.

31 Lawv thiaj tso Das Nias rau hauv lub nkuaj tsov. Das Nias nyob tau rau hnub tseem hauv nkuaj tsov.

32 Nyob hauv lub nkuaj ntawd muaj xya tus tsov, cov tsov ntawd ib hnub lawv noj ob tug neeg raug txim thiab ob tug yaj.

Thaum lawv yuav muab Das Nias rau tsov noj mas ob peb hnub ua ntej ntawd lawv tsis muab dab tsi rau cov tsov noj. Lawv txhob txwm cia cov tsov tshaib heev ces tsov thiaj yuav tom Das Nias sai.

33 Thaum ntawd nyob Yus Das teb muaj ib tug Yaj Saub hu ua Has Npas Kws. Has Npas Kws nyuam qhuav ua ib co kua dis thiab nws tso tej daim mov mog nyob hauv ib lub tawb, nws yuav xa zaub xa mov rau nws cov qhev sau nplej noj.

34 Ces Huab Tais ib tug Tshiab hais rau Has Npas Kws tias :

"Cov txhiam xws koj tuav no mas koj nqa mus rau Das Nias noj nyob hauv lub nkuaj tsov nyob Npas Npis Los."

35 Has Npas Kws teb tias :

"Huab Tais, kuv twb tsis tau pom dua Npas Npis Los ib zaug li. Kuv tsis paub lub nkuaj tsov ntawd."

36 Ces tus Tshiab tuav nkaus tus Yaj Saub Has Npas Kws cov plaub hau nqa nws mus txog Npas Npis Los teb thiab tso nws nyob ze lub nkuaj tsov.

37 Has Npas Kws qw tias :

"Das Nias, Das Nias ! Koj txais cov

txhiam xws uas Tswv Ntuj xa tuaj rau koj."

38 Das Nias hais tias :

"Kuv tus Tswv Ntuj, koj nco ntsoov txog kuv, koj tsis tso cov neeg nyiam koj pov tseg."

39 Ces Das Nias sawv los noj mov. Tam sim ntawd Tswv Ntuj tus Tshiab coj Has Npas Kws rov los nyob hauv nws teb chaws.

40 Das Nias nyob hauv nkuaj tsov tau xya hnub lawm, tus vaj tuaj nyiav Das Nias. Thaum tus vaj tuaj txog ntawm lub nkuaj tsov, nws ntsia, nws pom Das Nias zaum twj ywm.

41 Tus vaj hu nrov nrov tias :

"Das Nias tus Tswv Ntuj, koj yog ib tug Huab Tais loj. Tsis muaj lwm tus Tswv Ntuj loj dua koj !"

42 Ces tus vaj kom lawv muab Das Nias thau tawm hauv nkuaj tsov los, thiab nws kom luag muab cov neeg liam Das Nias pov rau hauv lub nkuaj tsov. Ces cov tsov muab lawv sib huas tag nyob ntawm tus vaj xub ntiag.